



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

State mokdanga ayuba ajanga  
tebilemstü mebentetsü: Kejriwal

Congress den yariteper BPF  
candidate 11 bendangleni yokogo

VOL. XVIII NO. 177 (ADOK 177) DIMAPUR TENTONÜ (MONDAY) RONGCHII (APRIL) 12, 2021 ₹ 5.00

## CTC Principal den tepila sentep sentong agi



CTC Board Chairman Dr. Sunep Imchen aser Prof. Rev. Dr. Mar Pongener na noksa nung angur.

**Dimapur, April 11 (TYO):** Prof. Rev. Dr. Mar Pongener den tepila sentep ka CTC nung April 9, 2021 nung kaogo.

April 9, 2021 nü Clark Theological College (CTC) nung taoba Principal Prof. Rev. Dr. Mar Pongener den tepila sentep sentong ka agiogo.

Dr. Mar Pongener ya ABAM Executive Secretary inyaktsü shima mapa tenzükogo.

Dr. Mar-i küm semer (30) tashi CTC nung mapa balala inyak. Pai Ttongtipangsa inyakba mapatem rongnung Dean of Post Graduate Studies, Academic Dean aser Principal liasü.

Dr. Mar-i tesayur ka ama aser lennir ka ama lenisüba nung balaka alakteta junga inyakogo, ta CTC Board of Governors Chairman, Dr. Sunep Imchen-i tenüngsang agüja jembi.

Pa dang pelar ta asüba tamaisü sayua nüngshi zülü tajung agütsü.

CTC Principal tasenba, Rev. Dr. A. Temjen Jamir-i Faculty aser Staff tenüng iba sentong nung o jembi.

"Dr. Mar ya ochishir lennir ka aser pa lenisüba ajanga College lenmang aisü nung jenjang temaleni ajungkettsüogo" ta Dr. A. Temjen-i ashi.

Pa ajanga CTC aser arogotem, lokti tentet aser kija balala aika

den tesendaktep tali akangshidaktsüogo, ta paisa ashi.

CTC kaketshirtem tenüng nungi Kongro Nungshijungla Jamir, MTh I-i tepila o jembidang Dr. Mar CTC kaketshirtem ajak anepaluba aser meimba indang ashi.

Sentong nung Dr. Mar-i o jembidang Tsüngrem, kinüngertem, arogotem aser pa den külem tenzükertem aser CTC kaketshirtem dang pelaba metetdaksü.

"Ni kü mapa nung takok angubaji kü kinüngtsü, jala jabasotem aser arok külem inyakertem ajak amalitepa inyakba ajanga liasü" ta paisa ashi.

Iba sentong nung Dr. Arenla Longkumer menden liasü, BD IV aser Interlude teloki temeja ken ka ka aten. Iba den Secretary, Literature & Education, ABAM Mr. T. Apok Jamir-i aser Longjang Baptist Arogo Pastor Mr. Sentilong Longchar nati salem o jembi.

Principal mapa nung sodi agir ABAM Executive Secretary mapa tasen benlokba asoshi tenüngsang agütsüba den temoatsü meshia Rev. Dr. A. Tali Ao-i anir teloki sarasadem aser tatem nung ABAM President, Dr. I. Lolen Imchen-i sentep tembanga sarasadem.

## NIDA-i lungkak aittsüba thinener

**Dimapur, April 11 (TYO):** Nagaland Chief Secretary-i Nagaland In-Service Association (NIDA) dang mepishiba shidi atema April 11, 2021 nü NIDA Executives aser Core Committee on Superannuation senden ka menogo.

Naga Hospital Authority, Kohima nung senden amendang April 12, 2021 nungi tenzükter anogo tenetnü (7) atema mass casual leave thinener

atatsü telemtetba agiogo, ta NIDA Core Committee on Superannuation, Convenor Dr. Thorhusie Katiry aser

Nagaland-Inservices Doctors Association, President Dr. E. Phyantsuthung nati külem sangdong ka nung ashi.

"Sorkari iba tebilemstü khuret atema telemtetba tajung ka agitsü ta amanga onoki iba telemtetba agiogo" ta tenatasa ashi.

## Tongpang Ozukum-i inter village link road 2 lapoktsü

**Dimapur, April 11 (TYO):** April 10, 2021 nü Mechanical & Housing (PWD) Minister, Tongpang Ozukum-i Mokokchung nung inter village link road ana lapoktsüogo.

Chakpa aser Yaongyimti (New) tsüngda link road lapoktsüba sülen Minister Tongpang-i o jembidang "iba lenmang ya 'friendship road' ta ajatsüla kechiyong iba ajanga yimtsüng ana tesentaktep akangshitsü" ta ashi.

Paisa iba gari lenmang anepalutsü atema teyari agütsütsü

ta nangzük. Village council chairman, Yaongyimti (New) Suponglemba-i o jembidang Minister dang pelaba metetdaksü.

Yaongyimti (New) nungeri küm 20 jungnüa iba gari lenmang aginüa aruba asangsang nung yanglutsüba atema kanga pelar, ta Suponglemba-i ashi.

Iba link road ajanga Chakpa atongtsü atema minute 9 dang agir saka taoba mapangbo ghonda tesadang ka agia liasü, ta paisa ashi.

Village council Chairman,

Chakpa Imkonglemba-ia Minister Tongpang dang iba lenmang yangluba ketdangsüa reprangba atema pelaba metetdaksü.

Minister Tongpang-isa Yaongyimti (Old) aser Salulamang yimtsüng tsüngda kilometer 7 inter village link road lapoktsü.

Iba lenmang yangluba ajanga Phangsang nung alirtemi Chuchuyimlang EAC circle office-i arutsü ana kümdaktsüogo. Ano, iba lenmang ajanga Yaongyimti (Old) nungeri farm aser tzülüli olioratsü tezüpa kümdaktsüogo.

## COVID-19 Nagaland: 5 dak putet; nisung 93 süogo

**Kohima, April 11 (TYO):** Deobarnü Nagaland nung nisung 5 dak COVID-19 aliba putetogo aser parnok züngsema nisung ajak agi 12,405 kümogo. Külen, Dimapur aser Mokokchung nung COVID-19 puteter nisung kaka asüba ajanga tasür ajak agi 93 kümogo.

"Tanü nisung 5 dak COVID-19 aliba putet. Parnokji Dimapur nung 3 aser Kohima o Mokokchung nung kaka lir. Maneni, Dimapur aser Kohima nung nisung kaka taneptsü nguogo" ta Health & Family

Welfare Minister, S Pangnyu Phom-i metetdaksü.

Nisung 12,405 rongnungi 11,992 taneptsü nguogo aser tang nisung 157 anepaludar, ta paisa ashi.

Nagaland nung COVID-19 nungi taneptsü angurji 96.67% lir, Health & Family Welfare Department Director, Dr Denis Hangsing-ia ashi.

Dimapur aser Mokokchung nung nisung kaka asüba ajanga tasür ajak agi nisung 93 kümogo. Tasürtem rongnung nisung 10 bo tanga timtem ajanga asü, ta paisa metetdaksü.

Nagaland nung COVID-19 puteter nisung 163 tashi tanga state temi ogo, ta paisa shisem.

Tang anepalurtem rongnung Dimapur nung nisung 6 dak shirangba yimya terara lir aser nisung 151 dakbo shirangba yimya mali, ta Dr Hangsing-isa metetdaksü.

"Nagaland nung COVID-19 alitsü akok ta temolung melemi bilemba sample 1,38,515 tendangogo. RT-PCR ajanga sample 75,822, TrueNat ajanga 37,606 aser Rapid Antigen Test ajanga 25,087 tendang" ta paisa ashi.

## Aor asentenshitsü nüngdaker: Sharingain Longkumer

**Dimapur, April 11 (TYO):** Aortemi alima den tsüngsü medemtsü atema lokti-rongsenketsüng aser yimtenren tsütsü asentenshi nüngdaker, ta NLA Speaker, Sharingain Longkumer-i ashi.

Tarutsü putu tajungba kümdaktsütsü iba asentenshitsüji kanga nüngdaker, ta paisa ashi.

April 10, 2021 nü Molu Ki, Kohima nung Kohima Aor Telongiem (KAT) lokti senden

nung o jembidang Sharingain-i iba tayongzükba agütsü.

"Tesüiba mapang Aortem ya milen amertem liasü aser wadang balala nung tanishirtem liasü. Tangar asoshi tatishitsü bentshitsü atema asenoki anir mapa tajungtem inyak. Asenoki tesüiba khen meyipa reprangshiba den tanü tensa asadangtsüla. Asenok tanü lokti, rongsenkettsüng mesüra yimtenren tsütsü kechi jenjang nung lir'ar metettsüla aser

temelenshitsü nüngdakbatem asadangtsüla" ta NLA Speaker Sharingain-isa ashi.

Tazünger aser sempet aketba lanur aika aliba den teka maiba ali hectare aika lir. Anungji asen kin aintsü atema asenoki item nübo aser ali rongsen timi amshitsüla, ta paisa ashi.

Iba sentong nung KAT Tir Chiden Yaden-i tesentepertem pelaa agizük. Lokti senden nung KAT Tir inyaktsü atema Chubalepzuk Ao shim.

## Home Department-i RIIN atema senden ayonger

**Dimapur, April 11 (TYO):** April 7, 2021 nü Cabinet senden nung telemtetba agiba nung ajemdaker Home Department-i Register of Indigenous Inhabitants of Nagaland (RIIN) atema senden ka ayongogo.

April 16, 2021 anepdang 10:00 ako nung Conference Hall, Nagaland Civil Secretariat, Kohima nung sendenji amentsü.

Home Department-i iba senden ya Kin Hohotem aser lokti tentet balala den amentsü jatelper aser senden nungsa Chief Minister, Deputy Chief Minister, Minister tem & Advisor tem, Chief Secretary, Commissioner, Nagaland aser Deputy Commissioner ajak adentsü. Senden nung adentsü jaokertem:

- \* Angami Public Organization, Kohima Tir aser nübo ka.

- \* Ao Senden, Mokokchung Tir aser nübo ka.
- \* Chakhesang Public Organization, Phek Tir aser nübo ka.
- \* Chang Khulei Setsang, Tuensang Tir aser nübo ka.
- \* Kachari Tribal Council Nagaland, Dimapur Tir aser nübo ka.
- \* Karbi (Mikir) Union, Nagaland, Dimapur Tir aser nübo ka.
- \* Konyak Union, Mon Tir aser nübo ka.
- \* Khiamniungan Tribal Council, Noklak Tir aser nübo ka.
- \* Kuki Inpi (Nagaland), Dimapur Tir aser nübo ka.
- \* Lotha Hoho, Wokha Tir aser nübo ka.
- \* Nagaland Garo Tribal Council, Dimapur Tir aser nübo ka.

- \* Phom Peoples' Council, Longleng Tir aser nübo ka.
- \* Pochury Hoho, Meluri Tir aser nübo ka.
- \* Rengma Hoho, Tseminyu Tir aser nübo ka.
- \* Sumi Hoho, Zunheboto Tir aser nübo ka.
- \* United Sangtam Likhum Pumji, Kiphire Tir aser nübo ka.
- \* Yimchunger Tribal Council, Shamator Tir aser nübo ka.
- \* Zeliang People Organization, Peren Tir aser nübo ka.
- \* Central Nagaland Tribes Council, Dimapur Tir aser nübo ana.
- \* Eastern Nagaland Peoples' Organization, Tuensang Tir aser nübo ana.
- \* Tenyimi Peoples' Organization, Kohima Tir aser nübo ana.





Kohima Aor Telongjem lokti senden Molu Ki, Kohima nung April 10, 2021 nü aliba nung Speaker NLA, Sharingain Longkumer-i o jembiba mapang tangokba noksa ka yangi angur.

### OTC Yangli nung Legal Aid Clinic ka lapokogo

**Dimapur, Rongchii/April 11 (TYO):** Gauhati High Court, Kohima Bench nung Judge aser Nagaland State Legal Services Authority nung Executive Chairman, Justice Songkhupchung Serto-i April 10, 2021 nü Oriental Theological College, Yangli, Tuensang nung Legal Aid Clinic ka semzükja liasü, kong Principal Secretary, Justice and Law Department, Government of Nagaland, Ramakrishnan, IAS; NSLSA Member Secretary N LongshithungEzung, NJS aser Secretary, Law & Justice Department, Nino Iralu, NJS nungertema dena liasü.

Iba sentong nung Serto-i ashiba agi, theological college ya ochi obendang sayuba tesem ka asütsüla aser ibaji nüburtem nem angazükdaktsüsüla, anungji yangi legal clinic akaba ya sentong tetemsü ka lir, kechiaser ibaji

ajanga justice ya curriculum nung shilem ka kumdaktsür.

Ozüng ya asenok dak kanga junga amenoka lir, aser item ozüng tamendak dak kumzükja, wazükja ayutsü aser nüburtem dang sangoktsüsü asen mapa lir, ta pai ashi aser kaketshirtem dang legal clinic nung anguba kakettez zünga nüburtem den shisatsü lemsateptsü ajungshia liasü.

Lenmang tai bushiba mapang nisung kati ochi obendang monguteter aser iba atema len sayutsüla aser teyari agütsüsüla, ta Ramakrishnan, IAS ajanga ashi.

Anungji legal clinic ajanga legal tsütsü tongtipang yimyatem angazükdaktsür asünung, nüburtemi item sapang ya amshitsüla, ta pai ashi.

Tongtipang tesemtem nung iba ama sentong ayongzükba aser obendangdak alema oa nüburtem tenzükba asoshi pai Judge aser

member secretary dang pelaba lemsatepa liasü.

Legal service ajanga legal aid, awareness aser shisatsü angati agütsür aser DLSAs indang front office nung item service bushiba mapang yariteper, ta Member Secretary N LongshithungEzung, NJS ajanga ashi.

Meta talang nung legal clinic lapokba ajanga teküpoktiba jenjang nung aliba nüburtem dena ajangzükter. Anungji nüburtemi iba clinic ya pei indang ama bilema service agütsüla, ta pai ayongzük.

Iba clinic ya hopta ka nung ananü lapoktsü, koba Para Legal Volunteer temi anepalutsü.

Sentong tetenzüklen Secretary Tuensang DLSA Kumdilong Kessen, NJS ajanga iba clinic indang rateta ashi. Iba sentong nung Antimangyang Chang, Retainer Lawyer, Tuensang DLSA menden liasü aser OTC kaketshirtemi temeja ken ka aten.

### Lokti balalai Asür Vehushu Medeo asükhu lemsatep

**Dimapur, Rongchii/April 11 (TYO):** Chakhesang Public Organization (CPO) indang tatong tir Vehushu Medeo asüba osang angashia kanga jashir, ta Chakhesang Wrestling Association (CWA) ajanga sangdong ka nung ashi. Vehushu Medeo ya April 10, 2021 nü Naga Hospital Authority Kohima (NHAK) nung asü.

Asür Medeo ya tasü tait, temolungsentsü temürek aser bendanga agütsüba nübur lenir ka liasü, ta CWA tir Vekhozo aser tongti zülur Kuzhovesa Soho nati sangdong ka nung ashi.

Pa asüba ya Chakhesang nübur asoshi nübu tajung aser lenir tajung ka samaba alitsü, shibai Naga nung aser talisa Chakhesang nübur ajungtsü asoshi tajungtiba nung tenzükogo, ta ashi.

Kinungtsü, chirnur aser kinungertem den CWA ajanga asükhu lemsateper, ta sangdong ajanga ashi.

Chakhesang Hoho Kohima-ia sangdong ka nung, anungji Phusachodu yimtsing nungi Vehushu Medeo asüba osang angashia kanga jashir, ta metetdaktsü.

Chakhesang Hoho Kohima indang tir Theja Therie aser tongti zülur Sakhohu Vadeo nati sangdong nung ashiba agi, asür Medeo ya Chakhesang Public Organisation nung tang tatong tir teinyakdak liasü.

Chakhesang nungi yimya aser ayak shidak keta alisang, Vehushu Medeo ajungben asüba osang angashia aoksar aser asükhu lemsateper, ta Chokri Chakhesang Literature Board (CCLB) sangdong ka ajanga ashi.

Pa asüba ajanga tawa adokdaktsüba asungtsü asoshi tasak asütsü, saka pai mapa tajung inyaka yutsüba kodanga mamadoktsü, ta CCLB ajanga ashi.

WC, NNPGs aser GPRN/NSCN züngsem ajanga tenüng nung asen

lenir asür Vehushu Medeo kinungtsü Sane aser lar tanurtem aser kinungertem den asükhu lemsateper, ta N. Kitovi Zhimomi, Convener WC, NNPGs aser GPRN/NSCN ato kilonser ajanga sangdong ka nung ashi.

Pa temolung taroktiba nungi Nagaland meima liasü. Pa linük meimer ka liasü, shibai nübur aser linük asoshi aria bilema inyak.

Loktiliba aser yimtenren tsütsü pai tangatetba tajung nung nokdaka liasü. Chakhesang nung lenir teyakyak ka ama pai WC, NNPGs nem shisa tajung agütsü, koba aroki shisadanga GoI den ken o jembiba mapang amshi, aser tang Indo-Naga status paper nung sayur, ta sangdong nung shia lir.

Nüburtem asoshi pai tsüingnep tajung yutsüogo. Tulusang Tsüngremi mangyimer kibong nem anisüngzük agüjang aser asür tanüla tesunep nung anisüngzükjang ta sarasademtsür, ta sangdong ajangasa ashi.



Dr. Sentinungla-i anir DMC ajanga Imkonglenden colony, Dimapur nung April 10, 2021 nü Anti Rabies vaccination drive ka agidang yangji alirtemi pei azü nem mozü agütsüsü anir aruba noksa nung angur. Iba mapang Imkonglenden colony aser temeket tesem nung alirba azü aser tanü 160 shi mozü agia temang anepalua liasü.

### NSF ketedangpur election April 30 nü agitsü

**Dimapur, Rongchii/April 11 (TYO):** Naga Students' Federation (NSF) indang Executive Council aser Assembly Executive kümsük 2021-2023 asoshi General Election ya April 30, 2021 nikongdang 2:00 ako nungi tenzükja Conference Hall, Ukhrul, Manipur nung agitsü, ta NSF indang election commission mendenpuba, K. Elu Ngang ajanga sangdong ka nung metetdaktsü.

tajungtiba nung agitettsü asoshi Election Commission ajanga Model Code of Conduct metetdaktsüsü aser mapangtong nung totuyuba balala agütsüsü. Item totuyuba sülen manidaker asoshi temerenshi alitsü, ta sangdong ajanga ashi.

Election Commission ajanga 2021-2023 kümsük asoshi menden taziung metetdaktsüba atema dang election ya agitsü, ta sangdong ajangasa ashi.

### Kohima nung 1buba Wood Chopping tetoktepba alitsü

**Kohima, Rongchii/April 11 (TYO):** Kohima Village nungi United Brothers ketdangtsüba kübok Naga Solidarity Park, Kohima nung April 30, 2021 nü 1 buba Open Wood Chopping Competition ayongzüktsü.

United Brothers tir, Vikeduolie Khruomo-i ashiba agi, iba sentong ya tebur aser tetsür atema alitsü aser iba tetoktepba nung senpet sen ajak senteper 3,60,000 agütsüsü.

Category anaprong nung mezüng jenjang angur nem senpet sen lakh ka, tanabuba jenjang angur nem senpet sen 50,000, tasembuba jenjang angur nem senpet sen 20,000 aser pezübuba jenjang nguteter nem senpet sen 10,000 agütsüsü, ta pai ashi.

Iba tetoktepba nung shilem agirtemi Naga nungeri akhi mapang nungi amshiba yimya nung süng ya minute 3 tsüingta paksatsüla/pakdangtsüla, ta pai ashi.

Alima tesem balala nung kasa yimya nung tetoktepba aliba aser temang anema alitsü tsütsü nungi iba sentong ya yanglutsü asatet, ta Khruomo-i ashi.

Iba sentong reprangi arurtem nungi tia takatiba ka nem atsüktsü süng pick-up truck load ka agütsüsü renema lir aser ano terepranger nem chiyongtsü den tzi agütsüsü. Ano iba tetoktepba nung pu tebour tajungtiba nem sempet agütsüsü.

Iba sentong nung shilem agitsü asoshi entry fee sen 2000 alitsü aser terepranger dang ticket atema sen 1000 meshitsü, ta pai ashi. Tejangrartemi iba sentong nung shilem agitsü form aser ticket ya Light House Fancy Market, Hotel Grandeur, Landmark, Cilla Spree aser High School junction nung angutsü. Iba dak sendakba nung osang tali tejangjaba nung metetnura mobile number 9366648588, 8794788780 mesüra 8974753283 nung tongteprateptsü akok.

### PCC nung Inter-Departmental Talk sentong agi



Patkai Christian College (Autonomous) nung April 10, 2021 nü Inter-Departmental Talk sentong alidang Suiyiwangle Kemp-i 'Human Trafficking - A Christian Perspective' onük nung ajemdaker jembidang tangokba noksa ka yangi angur.

**Dimapur, Rongchii/April 11 (TYO):** Patkai Christian College (Autonomous) indang Departments of Education aser Philosophy ajanga April 10, 2021 nü Bundrock Auditorium nung Inter- Departmental Talk sentong ayongzükja agia liasü.

Iba sentong ya department anaprong nungi Semester VI nung azüngertem parnok indang research study nung shilem ka ama agia liasü. Iba sentong nung kaketshirtemi onük balala nung research agiba nung ajemdaker jembia aser iba sülen tasüngdangba aser telangzüba session agia liasü.

PCC indang Philosophy aser Education department shia nungi nisung pezüi shilem agi. Mezüng shilem agisang, Paton-i 'Culture as the main source of one's identity: A Philosophical Approach' onük nung ajemdaker jembia liasü.

Tanabuba shilem agila, Suiyiwangle Kemp-i 'Human Trafficking - A Christian Perspective' onük nung ajemdaker jembia liasü. Nisung shibelenba tera ya makamaitba, tetsür-tebur temeden bendanga amshiba aser temesepba mozü chia-ajemba ajanga adokdaktsür, ta lai ashi.

Shilem agir tasembuba, Tshezokhroü Mero-i 'Juvenile Delinquency' onük nung ajemdaker jembia liasü.

Shilem agir pezübuba, Hreli ajanga 'Need of value education in modern society' onük nung ajemdaker jembia liasü.

Iba sentong nung Dr. Wojanbeni S. Yanthan onir liasü, kong Mhao Tungoe ajanga Tsüngremi temoatsü jazüka sarasadema liasü. Neilevono Vüprü ajanga tepela ankep o jembia aser Kaisü Losa ajanga sarasadema sentong tembanga liasü.



# Dibrugarh nung özüngi memelaba Aadhaar card centre makdok GHADC election atema nüboyimba tembangogo



Dibrugarh Police-i Paltan Bazar nung özüngi memelaba Aadhaar card centre nung nisung asem apuba sülen asüngdangya asüba noksa nung angur.

**Dibrugarh, April 11 (Agencies):** Assam kübok Dibrugarh nung özüngi memelaba Aadhaar card centre ka makdokogo.

Dibrugarh Police-i Paltan Bazar nung iba centre mita oa makdok. Iba dak sendakba nung nisung asem apu.

Par asemji Lakhimpur nungi Dipen Doley (29), Bitupan Deori (27) aser Aibi Deori (30) nungertem lir ta jangjaogo.

"Paltan Bazar tesem nung özüngi memelaba Aadhaar card centre ka lapoka aliba osang tejangja ka onoki angazük" ta

Dibrugarh police station officer-in-charge, Rajiv Saikia-i ashi.

"Osang nung ajemdaker onoki mita aodang nisung asemi Aadhaar card centre ji lapoka aliba angu" ta Saikia-i ashi.

"Onoki iba dak sendakba nung nisung asem puogo. Ano nisung asem dang asüngdangya asütsü atema sota lir" ta paisa ashi.

Par asem ket nungi desktop, laptop tem, Aadhaar form tem aser Rs 5,000 ngutetogo, ta Saikia-isa metetdaksü.

"Parnoki Aadhar card ka

yanglutsü atema Rs 300 meshi. Onokisa Tata Nixon gari (AR 01M 8130) puogo. Iba ken o atema bushisüngdang südar aser Dibrugarh nung özüngi memelaba Aadhaar centre tem makdoktsü" ta paisa shisem.

Assam nung özüngi memelaba Aadhaar centre aika lapoka lir ta osang angazüker aser kiburtemi sen aika aazüker.

"Nisung aika Aadhaar card yanglutsü atema yangi arur. Parnoki para ki ka nung tesüiba anogo ishika iba mapa inyaka aru" ta Paltan Bazar nung alir kati ashi.

**Shillong, April 11 (Agencies):** Meghalaya nung Garo Hills Autonomous District Council (GHADC) election atema nüboyimba maparen tembangogo.

Nüboyimba tatembang anogo nung Leader of opposition aser Congress star campaigner taoba Chief Minister Mukul M Sangma-i Plain belt area nung nüboyima liasü.

Külen, NPP star campaigner Chief Minister aser party president Conrad K Sangma-i Tura area nung nüboyima senzü.

Conrad-i sorkari inyakba maparen indang jembia aser Mukul-i NPP-i aniba NDA sorkari ochimashi inyakba indang jembia liasü.

Congress den külemi tanga party temi GHADC nung senotsü tim mesüi amshiba,

itasen magütsüba, sorkari state aser nübortem atema mebilemetsüba onüktem jembio.

Parnokia Meghalaya nung load shedding, power cuts aser power failure indang jembia.

Garo Hills region kübok district pungu nung NPP aser opposition Congress-i constituency 29 prong nung tokteper.

Menden timba ka nung Congress aser NPP tsüngda tokteper aser menden kar nung Independents, GNC, BJP aser UDP-i parnok den tokteper.

Constituency 29 nung candidate ajak agi 182 shi lir aser parnok rongnung tetsür 8 aser tebur 174 lir.

April 12, 2021 nü vote enoktsür nisung 7, 43,717-i polling nung shilem agitsü aser April 15 nü votes azüngtsü.

## Congress den yariteper BPF candidate 11 bendangleni yokogo



April 6, 2021 nü Kokrajhar East constituency nung Bodoland People's Front (BPF) candidate Pramila Rani Brahma-i lai vote agütsür temeyong sayuba noksa nung angur.

**Guwahati, April 11 (Agencies):** All India United Democratic Front's (AIUDF) sülen anidaka Hagrama Mohilary-i aniba Bodoland People's Front (BPF)-ia parnok candidate tem tangaleni anir ogo.

May 2, 2021 nü votes mazüngdang Bharatiya Janata Party (BJP)-i parnok alizüktsü akok ta tsüba bilemba agi BPF-i iba mapa inyak.

BPF candidate 11 tashi linük adener tangaleni yokogo aser parnok den Members of Council (MCLAs) 16 dena lir, ta osang angazüker.

BPF candidate ka dang anünga alibaji minister Pramila Rani Brahma lir. La ya Kokrajhar East constituency nungi kümsük 6 ben buba atema MLA inyaker.

BJP nem osang magitepdaksütsü atema BPF candidate tem koba linüki anir ao'ar memetdaksür.

BPF tanishir Hagrama Mohilary-i yakünü 3:30 ako nung senden ka ayonga amen aser idang nung jagi BPF candidate tem anientsü tenzük.

Congress-i aniba Grand Alliance nung züngsemtemia BJP-i candidate tem mesüzüka anir moudaksütsü atema mapa inyaker.

"BJP-i democracy anema inyakba mapa nungi jembua alitsü atema asenok kümdangtsüla. Tesüiba mapang BJP-i Congress-free India kümdaksütsü atema mapa

inyakba ajangshiogo. Constitution anema parnoki onok nem Goa, Manipur, Sikkim nung sorkar mekümdaksü" ta Nazira nungi Congress MLA Devabrata Saikia-i ashi.

Opposition-i parnok candidate tem anienba atema BJP party temolung raksar, ta journalist nungi yimsüsür akümba Ajit Kumar Bhuyan-ia ashi.

"BJP-i MLA tem alizüker ta media aika nung olulutem liasü. BJP-i tashi angutsü atema mapa tamajung inyaker. Iba jagi candidate tem anienogo. Iba atema BJP kanga temolung shiranger" ta pai metetdaksü.

BJP-i aniba 'mitrajoot' alliance nung züngsem kari iba inyakyim ajanga candidate tem dak temolung malemba sayur ta shiogo.

"Asenoki temolung alemertem candidate asütsü shimogo. Parnok candidate tem alizükteter ta bilemer süra kodaser parnoki nübortem atema tajungtiba inyaktettsü? Iba ya drama ka dang lir" ta Asom Gana Parishad (AGP) lennir Atul Bora-i ashi.

Assam nung Congress-i aniba Opposition party tem nungi candidate 20 shi ka Hokolbarnü Jaipur nung luxury hotel kati anir ogo.

Candidate tem rongnung Badruddin Ajmal-i aniba All India United Democratic Front (AIUDF) aser Left party tem nungi züngsemtem dena lir.

## Guwahati nung mask meinokertem merenshitsu

**Guwahati, April 11 (Agencies):** Assam nung nisung aika dak Covid-19 putetba nung ajemdaker Kamrup (M) district administration-i Guwahati nung mask enoktsü özüng agütsüogo.

Guwahati nung mask meinokertem dang district administration-i senchi achitsü.

"Onoki district nung mask meinokertem dang senchi achitsü. Nisungtemi mask meinokra ketdangsurtemi mezüng atema Rs 500 senchi achitsü aser tanabuba atema Rs 1000 achitsü" ta Kamrup (M) DC Biswajit Pegu-i ashi.

Mask shitak meinokertem dak-a senchi achitsü, ta paisa

ashi. Yaküm COVID-19 wara tiyalong nung Gauhati High Court-i state police dang Covid-19 inyakyim alema inyakerem merenshitsu tetuyuba agüja liasü.

Kamrup (M) April 1 nü nisung 33 dak putetba Hokolbar tashi nungbo nisung 153 kümogo.

"Yimsüsür kari mashii jembiba aser Covid-19 inyakyim sülen manidakba ajanga tensa tamajung ajurudaksüogo. Tangbo nisungtem dang mask enoktsü osang sangdongtsüba tasak kümogo" ta doctor temi ashir.

"Nübortemi yimten

yimsüsürtem aser sorkari ashiba angar. Sorkar nungi nisung kari mask enoktsü nungdak mali ta shira, ibaji nübortemi angaoker. Lennirtemi iba ama yimya tamajung mesayutsüla" ta Dr. Rashna Dass Hazarika-i ashi.

Taoba hopta Assam health minister Himanta Biswa Sarma-i nübortem dang mask enoktsü nungdak mali kechiyong Assam nungi coronavirus ogo ta shia liasü.

Deobarnü Assam nung COVID-19 agi shiranger ka asü. Tanü Guwahati railway station nung nisung 19 aser Kamakhya temple nung nisung 3 dak COVID-19 aliba putetogo.



Goa nung ayonga agiba Rubaru Mr India 2020-2021 nung Manipur nunger Songashim Rungung-i Rubaru Mr India-United Continents title takok nguogo. Arishi küm 25 tain Songashim ya Ukhrul district kübok Talui nunger lir aser pa ya Tangkhul Naga kin nungi lir. Taküm küm tatemlen Mr United Continents nung pai India tenüng nung shilem agitsü.





## TIR YIMYIM YIMOBILEM (EDITORIAL)

DIMAPUR TENTONÜ, RONGCHII (APRIL) 12, 2021

### Chichia Mangyimer

- Tangsen Lemtur

**P**rinse Philip-i tejangraba tulu nung Britain linük tenzükogo, anungji pa asüba ya Queen Elizabeth II atema dang masü saka linük atema-a takoksa tulu. Duke of Edinburgh, Prince Philip arrshi küm 100 ajungtsü ita asem dang lia April 09, 2021 nü alima nungi pilaba sülen Queen aser tamarener kibongi dang masü saka linük nübur ajaki mangyimer, kechiyong pa atura mapang pai nübur tajungtiba agi tenzükogo. Queen arrshi küm 94 lia la kinüngbui la toktsür asür. World War II mapang nung pai tongbang aika nung shilem agia liasü, talisa pa arrshi küm 19 dang asüdang 1941 küm March 28 nü Greece tzükümlen nungi pilar Cape Matapan nung Italy nung navy rong aika tzüyim telungi idaktsüba otsü mamateter. Tenteta aliba rejutem aser chuba yimlitem nunga temelenshi maneni alitsü aser Queen-a mapang ka nungbo süadoktsü. Lenirtem süadokba mapang nung ozüng ama linük nübur ajaki mangyimtsü atema sangdonger, saka lenir jagi akümüli mapang nung nübur junga tenzüka ali nung ang nüburtemi chichia mangyimer, ajioda Britain nungeri atangji pa asüba atema chichia mangyimer. Prince Philip-i temelungtetba tulu nung linük tenzük aser World War II nung pai kanga tasü itta raraba ajanga Navy nung tanubortem rongnungi First Lieutenants jenjang angur rongnung pa densema liasü. Akhidang nungi tamarener kibongi yimsüsüba reju ka nung pa ajemok. Pai linük atema tongbang nung nokdakba sülen maneni tejangraba tulu nung linük nüburtem tajungtiba agi tenzükba tarutsü lanu putuia mamatoktsü. Pa akümüli mapang nung pai Duke of Edinburgh Award Scheme tenzüktsü aser iba scheme kübok 1956 küm nungi tenzüka nüburtem tenzüktsü asoshi alima tesem ajungalen lanur million aika nem maangka agütsüogo. Paisa British engineering & science ajungkettsütsü atema inyak aser temeim mapa balala inyaktsü atema tenla aika agüja liasü. Pa kijai nüburtem atema maparen 22,000 dak tema inyaktsüba sülen arrshi küm 96 lia pai tenzükba wadang nungi anisüngzüka liasü. Pai küm 70 dak tema linük tenzüka aruaka pai pa asüpila sentongjibo kanga tongmelang agi dang agidaktsünüa liasü. UK nung nüburtemi anogo aika dang masü saka küm aika mangyimtsü. Tanü alima nung lenirtem aikati pei khuret mangateti pei atema dang bilema inyakba agi nüburtem okronger. Ajsüaka lenir karibo pei nübur taküm jenjang ajungkettsütsü aser alima tajungba akümütsü atema nübo, shisatsü, sempet aser rongsen ajak tenla agüja tenzük, aser item ama lenirtemjibo süadokaka alimai mamateter. Prince Philip asüba osang sangdongba sülen alima nung alirtemi pa akaba ali, kiojen aser rongsen indang meshisadanger, saka pai nübur koma tenzük?, ta metetnüa pa taküm otsü bushia züngdang. Pei koloki shisatetba ajak agi nüburtem bendanga tenzükba ajanga nüburtem lireptsüka lidaktsüba lenirtemji nüburtem asoshi temoatsü tulu rongnung ka asütsü.

## OLEMSABANG

### TASÜ TAIT TENZÜKER NÜNGDAKER

~ Wati Longchar (Serampore)

#### Tesalonika Arogo nung Tenzük mezüngmeshi

Pauli Tesalonika arogo dangi yamai zülu, "Saka adianutem, nenok rongnung shiri inyaker, aser Kibuba nung shiri nenok yaria ajungshir aser nenok kümdangdaksür, parnok dang nenoki akhüm tsübua benshiang. Aser nenok rongnung parnok mapa atema temeim nung kanga akhüm tsübua benshiang ta onoki nenok dang mepishir. Nenok rongnung putepa liang. (1 Tesa. 5:12-13). Arogo nung tenzük akhümstübuang ta Pauli kechiba zülu? Tamager kari tangar olulu dak amanger mezüngmeshi aser nüburtem mezüngmeshitsüa tenzükertemia tasü ita Yisu indang kuli mesütet ajanga Pauli zülu.

Tamanger kari tenzük anemasensamasajajembi, aser arogo mapa nung meyaritep. Nisung karibo tenla magütsü, agütsütsü kecha nungdak malita jembi. Arogo lanu putu, tenyar Paul arogo ka nung dang masü saka, tetsüngda talanglang pilar, arogo aika achayangtsüa aküm. Iba mapang sayutsünger, ainkar aser shiner jenti adok. Tazüokba yimden ka mali pei sünütsü asü aser sayu. Parnoki tesayuba balala sayua nüburtem mangmangdaksü. Kari Yisu Khrista tanaben asen putu nungsa, asen tenüki ngua arutsü ta shin. Karibo iba küm, anogo nungji arutsü ta shin. Alima yakta samatsü aserkotaki tamanger ajak tuadoktsü, anungji mapa inyaktsü nungdak mali. Ali rongsen bendentsü, rizüngtsü nungdak mali ta sayu. Saka shinba ama par putu Yisutanaben maru. Nüburtem tezüdang alu. Ano külen sayutsünger, ainkar karbo peiajungtsü, konang-naroküm aser tajangzük asoshi inyak. Kari takar dangashi sensakerbo tenüki mangu, senzüka yutsü. Ano karibo tanela ain niang tuluba ta toktepa, tangar aija aser mezümeküma jembi. Iba yongji Yihuda nung aser Bendanger (Gentile) shirnok mamanger liasü, parnoki Pauli anir teyazü sayuba ajanga lokti nung azümasener, mapa meinyaker aser meshimetsür tali adokdaksür ta aija jembi aser azüktsü amokmeren. Pauli anir ainkar aser sayutsüngeritemi nüburtem mashileni anir, nübur rongnung makmakshimak adokdaksür, alima sensak tiai yoker, nüburtemi lokti memeimer aser parnok atema dang bilema mapa inyaker ta aitsü. Tesalonika arogo tamanger aikati Yihuda aser Bendangerikechitaitesüba o jembir aji shitak ta amang kechiba süra teyazü tesayur aser pei konang-naroküm aser rongsen meimer tenzük aser sayutsünger aika liasü. Yongji nübur aikati tenla magütsütsü ta, kar Khristan telungjem nungi atsüngzüka ao, kari arogo nung tenzük anema jembi, mezüngmeshi aser akhümstübu magütsü. Nüngsen, temulung masüba, teyazü, tema tazütsü tenzükertem ta atalaa jembi. Pauli Tesalonika arogo nung amangba pur dang arrtsür masü, saka tenzükertema nüburtemi mezüngmeshitsüa tasü meiti inyak parnoka aitsü. Teyazü tesayur dang nungi balala melitetba aser tasü maiti Yisu Khrista indang kuli mesütetba ajanga alima raksar. Tasü ita ochi nung kuli züra nüburtemi akhümstübuttsü ta ashiba shiti ka lir.

Anungji Paul-i Tesalonika arogo nung atsüngzüka oa alirtem shirnoki arogo nung tenzük akhüm metsübui mezüngmeshia benshi aser jembi, parnok dang atangji Tsüngrem tenzükertem aser teyazü/tema tazütsü tenzük tepila indang pa taküm kuli-iatishia ashiba shity ka lir. Pauli pa ama Tsüngrem tenzükertem shirnoki bendanga agüja, tasü ita tenzük parnokji meimtsüla, yaritsüla, timtema meyutsütsüla aser akhümstübuttsüla ta Tesalonika nung dang ashiba angur.

#### Atangji Tsüngremi ajaba Tenzük


Atangji Tsüngremi jatetba tenzük ka jagi bendanga agüja, tasü ita aser oshi nung mapa ajak inyaktsü. (1 Kor. 15:10; Gal 4:11; Phil 2:16; Col 1:29; 1 Tim 4:10). Pauli Korinth arogo nung dang atangji Khrista melen nokdakba tenzük ka jagi taküm bendanga agütsütsü ta sayu. Paul, Khrista tenzük ka asü nung, nüburtem ajungtsü mechi pai yiar ama tasü itatemenen anema jembi, tani-tebelem aiben ajururu, tepuokdak ali, aser mezüngdangteti tazükba angur, aiben tasütsüa azük. Yihuda nungeri punguben tashi, azükba shia semer-tukubenben azük. Asemben tazükba süng agi azük; khen lung agi aon, asemben rong raksaba ajuru. Aonung ka, anogo ka tzüyim nung liasü. Aeni aodang aiben, ayong lendong nung, rakzükraakterem lendong nung, pei lima nisung lendong nung, tzüyim lendong nung, tiyazü adianutem lendong nung, Bendanger lendong nung, yimti lendong nung, arem lendong nung, tebelem aser timtem nung, nükena aliba nung aiben, temokong aser mangsa nung yamala timtem aika arogotem asoshi anogo shia shisabulu arema tenzük aruogo (2 Kor. 11:23-29). Yamaji ochi Osangtajung asoshi tasü ita jembi nung Rom nung yimsüsür Nero-i 64CE nung Paul tepset, otsü ashiba agi sayutsüng tesüdak nung telolak dangzüka yok ta ashir. Atangji Tsüngrem tenzükertem yamaji tasü taitalimai nungdaker. Teyazü nung Tsüngrem tenzük mezüngmeshibaji temeshi arogo mezüngmeshiba aser Tsüngrem sensatsüba amai lir ta metettsüla ta Pauli Tesalonika arogo pur dang ashiba angur. Mapa meranga inyakba aser bendanga agütsüba tenzük arogo nung koda tongtibang aji Paul taküm kuli ajanga sayur. Tenzük shirnoki mapang magütsüner, aser meranga meinyakner parnoki nüngsen aika ajurutsü. Nübur tanela nung tzüra matemtsü. Arogoji Tsüngrem meyong, yongji tenzükba temeshi mapa. Temeshi mapa mendenji akhümstübuttsü tim. Tenzükertema Tsüngrem melen noktakerem asü nung "Ni" ta teyaksanga masü, saka temeim agi, arogo aser nüburtem songjem ajungtsü asoshi aria bilema inyaktsüla. Temeshi menden temeshi ama meyutetra, nüburtemi akhüm metsübutsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



# Prof Rosemary Dzüvichü-i lanurtem dang tesunep osang abener asütsü ayongzük



Chiephobozou nung April 10, 2021 nü 32 buba ACYA convention agiba mapang lanurtemi sobaliba ken ka atandang tangokba noksa nung angur.

**Dimapur, Rongchii/April 11 (TYO):** Naga Mothers' Association (NMA) indang advisor, Professor Rosemary Dzüvichü-i Honibarnü Angami Catholic Youth Association (ACYA) züngsem ajunga dang alima nung tesunep osang abener kaka asütsü ayongzüka liasü.

Chiephobozou nung 32 buba ACYA convention agiba mapang Dzüvichü-i Pope Francis ajanga jembiba den medemdanga, alima melenshitsu asoshi lanur dak tashi lir, kechiaser parnoki tesunep asoshi tashi tait ola bona lir, ta ashi.

Anungji lai parnok dang lanurtem dak milak jangurba mesamadaktsüsü nenshia ashi.

Alima nung ochimashi agi sünga lir, anungji lanurtemi pei temeden asoshi nokdaktsüla, ta lai ayongzük. Laisa ochimashi liaka tesunep alitsü nüngdaker aser aji Tsüngremer sentong, ta ashi.

"Challenges ahead for the Angami Catholic Youth," omen nung ajemdaker jembiba mapang Nagaland nung mapan manguba timtem tali akumba indang onüka benoka jembia aser lanurtem dang mapa meranga inyaksü yimya süpatsü ajungshia liasü.

Dzüvichü-isa state nung ochi mashi inyakyim indang onüka benoka jembia aser Naga nung loktiliba nung ochimashi

inyaksangshi ya yimya ka kumogo aser arogo nunga kasaji inyaker, ta ashi. Lai catholic lanurtem dang pei mapa nung ochishia temolung agüja inyaksü aser ochimashi anema nokdaktsü ajungshi. Lanurtem tsüngta tetoktepba tanüla alitsüla aser kasa mapang lenir akumtsü shisatsü agütsüsüla aser arogo nung lanurtemi temolung agüja shilem agitsü lai ayongzüka liasü.

Dzüvichü, shiba Nagaland University (Department of English) nung professor ka lir, lai pei ayak aser sobaliba wazüka ayutsü nüngdaka aliba indanga jembia liasü.

Lai lanurtem dang puti otsü aser tetsü-tebou ken amala zülua aser mangaoka yur tarutsü putu nem angazükdaktsüsü ajungshi.

Lanurtem kin ka nung mesüra yimtsüng ka nung kisüng züngsem ama melie tangatetba ulushitsüla, ta ashi.

Maneni lai Naga nung loktiliba nung tetsür- tebur bendanga amshiba indanga jembia liasü.

Tetsürtem yakbangi arua pei temeden nung kibur akumtsü mapang tongogo, ta lai ashi.

Kasa mapang teburtem dang loktiliba nung tetsürtem jenjang ajungkettsü asoshia bilemstsü ajungmeso liasü.

State nung telemtetba balala agiba lokti nung tetsür

agi anünga aliba athishia, tetsürtem dang loktiliba nung aser arogo nung shilem agitsü bilemstsü ayongzük.

Maneni iba sentong nung Sr Khrievinuo Christina Ziephrü, MSMHC ajanga "Wisdom opens the way" onük nung ajemdaker jembia liasü. Iba sülen session danga ka nung Fr Keduolhou George, Principal, St Joseph College Jakhama ajanga "Blessed is the man who trust in the Lord" omen nung ajemdaker jembia liasü.

Iba mungdang tenzüker ananübuba nung Northern ACYA, Southern ACYA, Chakhroma ACYA, Kohima Town ACTA aser Western ACYA nungi sobaliba saya balala agi shilem agia liasü.

## ANOGO ABEN TSÜNGREM DEN

### Osangtajung abenba tetsüngji tobur tajung

*"Zülua aliba ama "Osangtajung indang sayutsüngirtem tetsüngji koda tobur tajung."*

*Rom 10:15*

Sadhu Sundar Singh shiba dang India nung amangba purtem "Tetsüng nungi azüh yima jajaba tesayur "(Apostle of the bleeding feet) ta ajar. Pa Sikh tamangba nung lia kodang temulung meyipa Khristan aküm, tebui pa magizük. Pa tedi-i miim (poison) aiben chidaktsü aser anasa alir kiyongertemi pa aliba ki takdang nung per yutsü, saka item jagi pa dak kecha masü. Pai Khrista osangtajung sayutsüngia tetsüng tesa agi India, Tibet, Pakistan aser Afghanistan tashi jajadang tetsüng nungi azüh adoka jaja ta otsü lir. Yisu Khrista aser pa nütsüngtem anogoshia tesem ka nungi kati aodang mapang timba ka tetsüngi jajaba indang laishiba nung shia angutsü. Parnoki tetsüng agi anibelem mesasai jajaba ajanga nübur aikati parnok sülen anidak aser aika taküm nung temoatsü aser tanepsü jenti angu. Ibaji ajanga osangtajung sayutsüngiba nung takok tulu bener arutsüba liasü, koba dang osangtajung indang sayutsüngirtem tetsüng koda tobur tajung ta ajar.

**Sarasadem**

Kibuba onok Ne osangtajung abener ka ka süteta alitsü nai maneni aniangma. Amen

## UCTM entrance gate sayaogo



NPWD Class-I Contractor, Isaac Zhimomi den United College of Theology & Missions nungi tesayurtem külemi college indang gate sayaba jakdang tangokba noksa ka yangi angur.

## Bendanglen aliba Ao arogo tem telungjem sentong agi

**Dimapur, Rongchii/April 11 (TYO):** Brahmaputra Jungle Resort, Sonapur nung Ao Baptist Church Guwahati-i April 9-10, 2021 anogotem nung mezüngbuba Nagaland Tezü Aliba Ao Arogo tem Telongjem sentong ka ayongzüka agia liasü.

Iba sensaksem sentong nung Delhi, Shillong, Jorhat aser Guwahati Ao Arogo tem nungi tenzüker 18 tashi arua dena liasü. Sentong nung shisa tuyur Dr. Lulen Jamir ajanga "Biblical Church model in the context of Urban Ministry" onük nung

anaben tashi jembia liasü aser iba sülen sensaksem agiba mapang, pei arogo nung ministry inyakdang temoatsü aser timtem ajurubatem lemsatep.

Iba sentong ajanga temoatsü aser tajangzük anguba ajaki lemsatepa liasü aser iba ama sentong ya kanga tongtipang asünung tarutsü nunga maneni agia aotsü asoshi ajaki pangjema renema liasü, ta Rev. Aowabang Ozüküm, Pastor, Ao Baptist Church Guwahati ajanga sangdong ka nung ashi.

**Dimapur, Rongchii/April 11 (TYO):** United College of Theology and Missions (UCTM) indang entrance gate tasenba Honibarnü Isaac Zhimomi, Class-I Contractor, NPWD ajanga sayatsüogo.

Iba gate sayatsüba sentong nung jembiba mapang Zhimomi-i nüburtem dang

Tsüngrem tsübua maneni mapa tajung inyaksü ajungshi aser tenla tajung agüja liasü. College principal Rev. Dr. Ashong Serto-i sangdong ka ajanga ashiba agi, iba gate ya medemer, kinunger aser temolungertemi tenla agütsüba nungi yanglu.

Iba sentong nung Hannah

Chuzho, Asst. Prof. UCTM menden liasü, Rev. Dr. Phuveyi Dozo, President UCTM ajanga Tsüngrem temoatsü meshizüka sarasadem, Rev. Dr. Ashong Serto, Principal UCTM ajanga tepela o jembia aser Rev. Dr N Toshi Ao ajanga sarasadema sentong tembanga liasü.



**OLONG PAITEP # 5779**

|    |  |   |    |    |  |    |  |    |  |   |
|----|--|---|----|----|--|----|--|----|--|---|
| 1  |  |   |    |    |  | 2  |  |    |  | 3 |
|    |  |   |    |    |  |    |  | 4  |  |   |
| 5  |  | 6 |    |    |  | 7  |  |    |  |   |
|    |  |   |    |    |  |    |  |    |  |   |
| 8  |  |   |    |    |  |    |  |    |  | 9 |
|    |  |   |    |    |  |    |  | 10 |  |   |
|    |  |   |    | 11 |  | 12 |  |    |  |   |
|    |  |   | 13 |    |  |    |  |    |  |   |
| 14 |  |   |    |    |  | 15 |  |    |  |   |
|    |  |   |    |    |  |    |  |    |  |   |
|    |  |   |    |    |  |    |  |    |  |   |
|    |  |   | 16 |    |  |    |  |    |  |   |

|                         |     |                                |     |
|-------------------------|-----|--------------------------------|-----|
| <b>TIPILEN</b>          |     | <b>LANGTSÜNGLEN</b>            |     |
| 1. O jembitsü tashi     | - 8 | 1. Tepok telung nung shilem ka | - 7 |
| 5. Süngjang tapu ka     | - 5 | 2. Tamajung aküm               | - 5 |
| 7. Tekanük nung enokba  | - 5 | 3. Chi den külemi achiba       | - 3 |
| 8. Teka amtep           | - 5 | 4. Meimchir allimai aruba      | - 3 |
| 12. Tzük asendak        | - 5 | 6. Laishiba nung ayong ka      | - 4 |
| 14. Tsünpang tema aliba | - 5 | 9. Tarutsü nükla               | - 7 |
| 15. Ken atenba yimya    | - 5 | 10. Tamendakdak/Nükjidong      | - 4 |
| 16. Asangur             | - 8 | 11. Tenük-telen mejungi aküm   | - 5 |
|                         |     | 13. Terok nungi adokba         | - 3 |
|                         |     | 14. Meimchir telemsa           | - 3 |

**OLONG PAITEP # 5778 TELANGZÜBA**

|                                  |  |                                      |  |
|----------------------------------|--|--------------------------------------|--|
| <b>TIPILEN :</b>                 |  | <b>LANGTSÜNGLEN :</b>                |  |
| 1. Taa, 3. Teküm, 6. Aibelen,    |  | 1. Tai, 2. Asensor, 3. Tanü, 4. Kua, |  |
| 7. Aut, 9. Ajizük, 10. Ojala,    |  | 5. Mitsüksü, 6. Azübenshi, 8. Lah,   |  |
| 11. Semer, 13. Sen, 15. Kioktsü, |  | 9. Jangkok, 12. Akok, 14. Nashi,     |  |
| 17. Itsük, 18. Kar.              |  | 16. Sür.                             |  |

**KIBONG BUDGET MAKABA AGI KIBONG SENSACK ADENER**

**Warakla** : Hai tambu...Ni ita piyong atema jang-otsü...totzü-sapon...metsü-mersü shishitsü Bazar-i aoba sernung...Second Hand suoshi langlanga yokshia denji...Aser ano tanür kazütsü Toys tajung langlanga yokshia denji agi itum-jiang alir...jang-otsü...totzü-sapon...metsü-mersu -bo mali-i arua.

**Alokba** : Tuufffaaii...Samesa tetsür...Tan itabo asen kinunger 'Second Hand' suoshi & tanür kazütsü 'Toys' aji soa chiyungtsüba aja...!!!!???? Tangar tetsür-ibo ita piyong kibong ka jang-otsü seret kwi agi perir...totzü-sapon kwi agi perir... metsü-mersu kwi agi perir...mozü-mora atema kwi ayutsü....tershilem tenla agitettsü... ta tik-tak 'Budget list' yanglur lija-liyonger....Nabo ibalaji kecha maka...tapi-tapi agi shishir...lbajagi asen kibong ya sensack adener ajaa.

**Warakla** : Eeeessh...Na kechi Budget indang jembir...Tanü putu nung sorkar-a dena paki Budget dang amenba ya nai-a osang kakët nung azünger südi...??? Na kecha shisa tepulo...Ni onok 'SHG' telok dang sen interest 10 % agi apoh'er tan ita atema jang-otsü... metsü-mersu... totzü-sapon teperi shishi-jar.

Lilir : L.Kika Pongener.

**TANÜBO NAI LANGZÜANG**

Q. NAFED indang headquarter kong lir?  
 A.Mumbai B.New Delhi C.Kolkata D.Chennai

\_\_\_\_\_ (Taruba adok nung onoki langzüksü)

**YASHI ADOK TELANGZÜBA : 1315m**

**AO OSHI ANGAZÜKDAK:**

**TANÜ ANGAZÜKTSÜBA OJANG**

**Bangchi**  
 (n.) Nisung aser shiruru dak azü ajemba mesen (leech)  
 \* Arem septsü nung **bangchi** kanga alir.

**Bangdak**  
 (n.) Tsüzüngozung yanglua yimsü asürtem (rulers)  
 \* Putu menden nung tatartemji **bangdak** purtem lir.



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**

Happy Birthday

1. Tenüng : .....  
 2. Tasoba anogo : .....  
 3. Küm : ..... 4. Class : .....  
 5. School : .....  
 6. Talidak : .....  
 7. Salem osang : .....

**NAI-A YA METETTER MA?**

**ALIMA NUNG AYONG TALANGTIBA KAR:**

| AYONG TENÜNG                    | TESEM                               | TALANG/METONG |
|---------------------------------|-------------------------------------|---------------|
| 1. Nile River                   | North-East Africa                   | 6,650         |
| 2. Amazon River                 | South America                       | 6,575 km      |
| 3. Yangtze River                | China                               | 6300          |
| 4. Mississippi - Missouri River | USA                                 | 6275 km       |
| 5. Yenisei-Angara-Selenga River | Russia, Mongolia                    | 5539 km       |
| 6. Yellow River                 | China                               | 5464 km       |
| 7. Ob - Irtys River             | Russia, Kazakhstan, China, Mongolia | 5410 km       |
| 8. Rio de la Plata              | South America                       | 4880 km       |
| 9. Congo - Chambeshi River      | Central Africa                      | 4700 km       |
| 10. Amur - Argun River          | Russia, China, Mongolia             | 4444 km       |

**SUDOKU # 5822**

**TELANGZUBA # 5821**

|   |   |   |   |   |   |   |   |   |   |   |   |   |   |   |   |
|---|---|---|---|---|---|---|---|---|---|---|---|---|---|---|---|
| 1 |   |   | 9 | 4 | 7 | 5 | 1 | 4 | 2 | 8 | 9 | 3 | 6 | 7 | 5 |
| 5 | 7 | 3 | 1 |   | 2 |   |   |   |   | 7 | 6 | 3 | 4 | 2 | 5 |
|   | 4 |   |   | 5 | 3 | 1 | 8 |   |   | 8 | 9 | 5 | 6 | 1 | 7 |
|   | 8 | 1 | 5 | 6 | 7 | 3 | 4 |   |   | 2 | 1 | 7 | 9 | 6 | 4 |
|   |   |   | 8 | 1 |   |   | 7 |   |   | 9 | 3 | 4 | 5 | 8 | 1 |
|   | 5 | 6 | 4 |   | 9 |   |   | 2 |   | 5 | 8 | 6 | 3 | 7 | 2 |
| 4 | 6 |   |   |   |   |   | 9 |   |   | 4 | 5 | 1 | 2 | 3 | 6 |
|   | 3 |   | 9 | 1 |   |   | 7 | 6 |   | 3 | 2 | 8 | 7 | 5 | 9 |
| 9 |   |   |   | 4 |   |   |   |   |   | 6 | 7 | 9 | 1 | 4 | 8 |

**OJANG LUTEP # 5366**

KAIA :

EMBILBA :

INKNYAÜ :

NGJYOIA :

TSTANÜR :

MBUTAR :

ERBKÜMO :

HITAS :

GIJA :

KEMNGZENAÜR :

**OJANG LUTEP TELANGZÜBA # 5365**

TERA DANG CHIR TEPOK MASÜNGDANG NUNGIBO  
 INYAKER TEPOK SÜNGA CHIANG

**TAN HOPTA ATEMA - KOMA SÜLA ?**

Q. Tang Nagaland nung government medical doctor-temi akangba ama, parnok kisung atema, parnok govt mapa nungi anentsü asoshi tasoba küm 60 aliba nungi 65 kümtsü nunga koma süla ?





Linük aser Patna nung covid tashidak menar tali kuma aoba mapang ka nung Maharashtra nungi migrant tem pei talidaki aotsü atema Patna railway station-i aruba noksa nung angur.

## State mokdanga ayuba ajanga tebilemstsü mebentettsü: Kejriwal

**New Delhi, Rongchii/April 11 (Agencies):** Linük yimtiba nung Covid-19 tashidak menar tali kuma aoba ajanga tebilemstsü kaa Delhi Chief minister Arvind Kejriwal-i Deobarnü, mokdanga ayuba ajanga wara tebilemstsü mebentettsü saka health care system chirepra yimti sorkari yimti mokdanga ayutsüsa akümtsü, ta ashi. Kejriwal-isa nüburtem shirnok tashidak keta aliba temaitsü mesayur mesera tera sayudar parnok dang mozüki aritepa maotsü aser kanga mejung shirangertem atema yipden azünga toktsütsü atema mepeshia metetdaksüogo.

"Delhi nung asenoki wave asem tashi raraogo. Wave pezububa ya kanga lendong lir. Iba ya kanga kara prokshia odor. March tom tashi nung anogo nung nisung 200 dak tajemba dak tashidak potetba ajangshiogo, Deobarnü taoba ghonda 24 tsüngda nisung 10,722 dak tashidak potetogo, koba anogo ka nung tashidak timtiba potetba asütsü. November ita wara kanga kara menatepyonga aoba mapang

anogo ka nung nisung timba agi 8,593 dak tashidak poteta liasü. Iba ajanga tang tashidak kanga kara prokshia aoba sayur. Iba ya tebilemstsüka aser onoki kanga kümdanga asadangdar," ta Kejriwal-i ashi.

Wara prokshia aoba nokdangtsü asoshi sorkari sentong balala yangluba indang jembidang pai, linük yimtiba nung Deobarnü nisung 10,722 dak Covid-19 tashidak potetogo, koba Honibarnü nisung 7,897 aser Hokolbarnü 8,521 liasü, ta ashi,

Delhi nung wave pezububa ya tesashitiba ta shia pai Delhi nung tashidak menartem arishi küm45 tekübok nung alir shilem 65 lir ta ashi. Paisa, Centre sorkar dang arishi küm tatakzük ka nung alirtem nem dang masü saka nisung ajanga nem vaccine agütsütsü asoshi aser vaccine agütsüba tesem tasen lapokba inyakyim salatsütsü asoshi mepeshia liasü.

Maneni Kejriwal-i nüburtem dang nungdakba mapang dang pei ki toktsür aotsü mepeshia asündang. Paisa, wara koktettsü atema political party ajak longjemer inyaksü ayongzük.

Onoki wara aziüoktsü atema lenla asem nung tongtibangsa inyakdar. Mezungbubaji Delhi nüburtemi sorkar den teka amteper inyaksüla. Tanabubaji onoki healthcare service - hospital yipden, ICU, ventilators... Hospital management tajungtiba agütsütsü merangdar. Ajak dang tongtibangtibaji nungdakba mapang dang mozüki aotsüla. Nisung ajak mozüki dangi aritepa ora yipden, ICU amala agi anünga akümtsü, kechiyong tashidak keta aliba temaitsü mesayuba nisungtemi mozükidang yipden

atsüngadokra kanga mejung shirangertem atema manungtsü aser iba ajanga tasüba aika ataloktsü, ta pai ashi. Tasembuba nung onoki vaccine takaratiba nung agütsütsü merangdar aser iba atema Centre sorkari dangi onoki temepeshiba yokogo, ta pai ashi.

Delhi Disaster Management Authority (DDMA)-i, lokti tulu adenshiba, kiyimba benjung aser asüpila sentongtem magitsü atema tetuyuba agütsüba sülen anogo ka lir Kejriwal-i iba olen lemsatepa liasü.

Delhi Disaster Management Authority (DDMA)-i, lokti tulu adenshiba, kiyimba benjung aser asüpila sentongtem magitsü atema tetuyuba agütsüba sülen anogo ka lir Kejriwal-i iba olen lemsatepa liasü.

## Mamata-i central forces amaksü ajungshiba ajanga nüburtem rongmeso: Amit Shah

**New Delhi, Rongchii/April 11 (Agencies):** Union home minister Amit Shah-i Deobarnü, West Bengal chief minister Mamata Banerjee-i central force tem amaksü ajungshiba ajanga nüburtem rongmeso Sitalkuchi nung CISF amak, ta ashi.

Amit Shah shiba Deobarnü Santipur nung roadshow ka nung shilem agia liasü pai Sitalkuchi nung nisung tepsetba ya yimden yimsüsüba ken o ka kümdaksütsü merangdar ta ashi.

"Mamata Banerjee-i nüburtem dang central force

tem amaksü ajungshi. Iba ajanga Sitalkuchi nung tasüba atalok masü na? Lai ajungshiba ajanga nüburtem rongmeso atua CISF amak. Iba o jembiba atema Bangal nunger tem dang tatok meshitsü Mamata ket nung ano mapang lir," ta home minister-i ashi.

"Mamata-i nisung pezü den dang asükhü lemsatep. Lai Anand Burman atema nüktzü jang ka danga melalu, kechiyong pa Rajvanshi lokti nungi lir. Pa ya la indang appeasement politics atema tapet masü. Iba amala politics ya Bengal

sobaliba masü," ta pai shisem.

Paisa, Bengal nung BJP-i sorkar kümtetra yimden yimsüsüba aser election dak sendakba azütokshi ajak tembangdaksütsü nangzük.

Kasa mapang nung Deobarnüsa Mamata Banerjee-i, Cooch Behar nung azütokshi lendong atalokba ya kin ka samatsütsü merangba maparen ka lir ta ashiba den state nung election shilem pezububa agia aliba mapang central force-i Sitalkuchi nung nüburtem dak rangloker injang khaloktsü, ta ashi.

Honibarnü local temi prangbong rakzüktsü merangba sülen CISF sepaitemi parnok dak injang khaloktsü aser nisung pezü tepset, ta police-i metetdaksü.

Mamata-isa, EC-i Cooch Behar-i aitsü tenokdangba agüja kuli tejangja magidaksütsü meranger, ta ashi.

Election Commission (EC)-i Honibarnü yimden yimsüsürtem Cooch Behar district-i ghonda 72 meyoktsü tenokdangba agütsüogo, kong election agiba mapang mepetmesü adoka nisung pezü tashi tepsetogo.

## Jammu and Kashmir nung kiralongrar 3 tepset

**New Delhi, Rongchii/April 11 (Agencies):** Jammu and Kashmir kübok Shopian jila nung security force temi aonung sangwaa meita aoba sentong ka ayongzük agiba sülen kiralongrar ana kasetogo, ta police temi Deobarnü metetdaksü. Kiralongrar ana tepsetba sülen tang tashi nung asem jungogo. Kiralongrar ka Honibar aonung khaseta liasü.

"Police aser security force temi tawa züngoksemba kiralongrar bendanga agütsüdaksütsü atema bendanga agüja inyakdar. Tsürapurtemia mepeshiogo, saka kiralongrartemi pa bendanga magütsüdaksü," ta police-i Deobar anepdang tweet asü.

Police ketdangsertemi ashiba agi, kiralongrartem munga aliba osang tejangja angazükba sülen parnoki Kashmir kübok Hadipora tesem meita ao. Sepaitemi bushitsungdangba mapang kiralongrartemi parnok dak injang khaloktsü. Iba sülen police temia parnok dak meyiper akha aser telok ana tsüngda khatap tenzük, ta ketdangsiuri ashi.

Rara nung tepsetba kiralongrartem maitsü aser parnok züngoksema aliba telok tanga tashi mejangjai lir. Kiralongrartem ket nungi AK-47 ka aser pistol ka ta

ngutetogo, ta army otongdar-i ashiba den parnoki maneni iba tesem meita odor ta ashi.

Iba hopta tetenzüklen Shopian aser Pulwama districts nung Ansar Ghazwatul Hind tekolakba Imtiaz Ahmad Shah densema kiralongrar tenet kasetogo, ta police temi Hokolbarnü metetdaksü.

Shopian nung Brehostibar nikongtsütsü nungi tenzük kiralongrar aser police na tsüngda ghonda 12 tashi raratepa liasü. Kiralongrartem ya mosque ka nung jenoker khatapa liasü.

Brehostibar nikongtsütsü nungi Hokolbarnü tashi khatapa mapang jama Masjid nung jenoka aliba kiralongrartem dang tsurapurtemi loud speaker ajanga bendanga agütsü atema mepeshia liasü, ta nüburtem aser sepaitemi ashi. Kasa mapang nung kiralongrartem bendanga agütsüdaksütsü atema jembishinütsü asoshi telok balala yoka liasü, ta ketdangsiurtemi ashi.

"Onok nükjidong tongtibangtibaji kiralongrartem süngjemshidaksüba mapang masjid meraket wazüka ayutsü atema liasü. Iba ajanga kiralongrartem den khatapba mapang sepaitem lendong tubuai idaktsü," ta Victor Force General officer in Command Major General Rashim Bali-i ashi.

## Priyanka-i CBSE board tatidang thitsütsü akhang

**New Delhi, Rongchii/April 11 (Agencies):** Congress general secretary Priyanka Gandhi Vadra-i Deobarnü shiti ka ajanga education minister Ramesh Pokhriyal Nishankon dang CBSE Board tatidang thitsütsü mepeshia asüngdangogo. Lai ashiba agi, tatidang agütsüba tesemtem nung kaketshirtem tashidak nungi jenboa metoktsütettsü.

Shiti nung lai, wara kanga sashia pokteter aliba mapang kaketshirtem tatidang agütsüdaksüba ajanga tatidang agütsüba tesem kar danga tashidak menatepba tesem kuma kaketshirtem aikadak tashidak potetra iba khuret ya sorkar aser CBSE board-i abentsü, ta ashi.

Laisa, linük nung Covid-19 tashidak nisung lakh ka tema dak potetba sangdongba sülen kaketshir aser tsürapurtemi wara kanga sashia pokteter aliba mapang tatidang agütsüba tesem nung nisung aika adenshia tatidang agütsütsüba tetsüba lemsatepogo.

Vadra-i ashiba agi, kaketshirtem shisabuluba ya timdang, kechiyong tashidak tamajung pokteter aliba mapang tatidang agütsüba ajanga kaketshirtem mesüngjemeti kümdaksütsü aser iba ajanga parnok dak aketba sempet

tajungtiba amshia tatidang magütsütettsü.

"Tensa apir parnoki tatidang thitsütsü akhangba ya tim dang lir.

"Sorkari school, kaketshir aser tsürapurtem den sensak asemtsüla ajita asünungdang education dak sendakba nung parnok tinyaksü inyaktettsü atema telemtetba tajung ka agitettsü. Kangshia lendong-i idaktsütsü melena parnok nongita yaritsüla aser ajungshia tekümütsüba agütsütsüla," ta Vadra-i ashi.

Laisa, yimden yimsüsür ka ama lanurtem kümzükba ayutsü aser len anitsüji onok khuret lir, ta ashi.

State sa state nung lokti tulu madenshitsü atema tetuyuba agütsür, ajisüka kasaji kaketshirtem nembo kangshia inyakdaksür, süra asenok koba nung ajemdaker nokdaksü, ta lai asüngdang.

Melenshir adokba CBSE board exams 2021 sheet nung class 10 tatidang May 4 nungi June 7 tashi aser class 12 tatidang May 4 nungi June 15 tashi agitsü renemba sangdongogo.

CBSE ketdangsiurtemi ashiba agi, tetsüngda ita inyaksangshitsü atema tatidang agütsüba tesemtem shilem 40-50 agi timba kümtsüogo.



UAE nung amendaker aliba shishilembar MA Yusuff Ali aser pa kinungtsü na mena aliba helicopter Ernakulam, Kochi kübok Panangad tesem nung ajunbena anenba noksa nung angur.





Britian indang prince Philip asüba sülen anogo ka lir tanurtemi Cambridge kikümtong nung naro toktsüi aruba noksa nung angur. Prince Philip ya Queen Elizabeth II kinungbo aser pai küm neter dak tema pa kinungtsü nongita aruba sülen Hokolbarnü süogo.

### Indonesia tir-i Java nung teküzmükba maparen inyaktsü tuyu

**Jakarta, Rongchii/April 11 (Agencies):** Southern Java asetkong nung menoknok anoka nisung ti tashi asüba sülen Indonesia tir Joko Widodo-i Deobarnü takaratiba nung teküzmükba aser teyari agütsüba maparen tenzüksü tetuyuba agütsüogo.

Honibarnü menoknok anokba lendong nung ano nisung asem tashi kanga mejungi yiru aser ki 1,180 dak tema raksaa liasü. Kitem timba terara dang raksa, ta disaster agency BNPB-i ashi. Kasa mapang nung ki karbo ajareper aliba Indonesian media ajanga sayuogo.

Lendong agi kongshir alirtem jenoktsü atema

Lumajang jila nung tejenokdak ana mesemteteter lir.

Nisung asüba aser yiruba ya Java anüdoklen district 15 aser yimitem nung ataloka liasü, koba menoknok anokba epicenter nungi anasatiba province lir.

"Ni jana nung nembanga aliba nüburttem agitetsü aser yirur alirtem anepalutsü atema teküzmükba aser teyari agütsüba maparen tenzüksü tetuyuba agütsüogo, ta Jokowi-i ashi.

Menoknok ajanga production facility tem dak kongshiba osang kecha mali, saka BNPB-i ashiba agi, public facilities 150 raksago. East Java nung industry tem ya

timba asetkong anüolentip nung amenoka lir.

Jokowi-isa, Indonesia ya Pacific nung volcanic "Ring of Fire" nung amenoka lir aser menoknok amala lendong tulu mashi mapang nung ataloktsü, ta ashiba den Indonesia teti renema alitsü nüngdaker ta ashi.

Southeast Asia nung aliba linük ya taoba hopta Seroja yipru agi kongshi aser iba ajanga tzümetsung aser anentsüh lendong ataloka East Nusa Tenggara kübok asetkongtem nung nisung 170 dak tema süogo.

January itaa 6.2 magnitude menoknok kati Sulawesi asetkong kongshi aser iba lendong nung nisung 100 dak tema süogo.

### China aser Russia nati tenokdangba agütsür: EU

**Rongchii/April 11 (Agencies):** European Union nung tongti ketdangsurtemi Deobarnü ashiba agi, China aser Russia nati tetsükdaktsü bener arutsüba ajanga Myanmar nung militaty-i sorkar atsünger aliba anema linüktem longjemer telangzüba ka agütsütsü atema jenjang tapet magiteter aser EU-i linük nung tanaben democracy benokra rongsenketsüung nung teyari tuluba agütsütsü akok ta ashi.

"Arms embargo amala inyakyim benoktsü atema Russia aser China nati U.N. Security Council nokdangba ya kecha tesüngmangtsü mali," ta EU foreign policy chief Josep Borrell-i ashi.

"Myanmar nung alinük dak sendakba nung tetoktepeba ajanga longjemer inyaktsü asoshi tetsükdaktsü adoker," ta Borrell-i ashi, shibai EU züngsem linük 27 tenüng nung jembir. "Ajisüaka onoki merangdangtsüla," ta paisa ashi.

Borrell-i ashiba agi, February ka nü militaty-i Aung San Suu Kyi-i aniba sorkar atsüngtokba sülen security force temi longkak aiter 550 dak tema tepsetogo, kong tanur 46 densema lir.

"Army-i pei nüburttem dak

tashiyim benshiba ngua alima ajunga tetsübu nung reprangteter," ta pai ashi.

China aser Russia naprongla Myanmar indang armed force den sendaktepa lir. Linük anaprongla yagi Myanmar nem tongpang nung amshiba hadirtem agütsür.

U.N. Security Council-i taoba hopta Suu Kyi aser military-i pua alirtem ajak chiooktsü khangogo, saka sorkar atsüngtokba atemabo maitsü.

EU-i, Myanmar military meyong company tem aser nisung kar nem tenokdangba agütsütsü renemdar. Bloc-i March ita military commander-in-chief densema sorkar atsüngtokba nung densema alir nisung 11 nem tenokdangba agütsütsü atema mulungtepa liasü.

Rongsenketsüung dak sendakba nung EU kangabo sendaktepa mali, ajisaka Borrell-i ashiba agi, linük nung democracy tanaben amenokra parnoki rongsenketsüung nung tesendaktep tali yanglushitsü atema maongka agütsütsü akok. Iba maongka kübok sustainable development dak sendakba nung shishilembaba aser rongsenketsüung nung tesendaktep tali yanglushitsüba densema lir, ta pai ashi.

### Pakistan nung April 13 tashi tenokdangba agütsütsü

**Islamabad, Rongchii/April 11 (Agencies):** Deobarnü nisung 5000 tema dak covid-19 tashidak poteta linük nung tashidak kanga kara menatepyonga aoba mapang Pakistan nung April 13 tashi maneni tenokdangba balala agütsütsü telemtetba agiogo.

Pakistan's National Command and Operation Centre (NCOC) sangdong ka ajanga ashiba agi, sorkari coronavirus tashidak aziüoktsü atema tenokdangba agutsür aliba April 13 nü tashi atsülangtsü atema telemtetba agiogo, ta Dawn sangdong ka ajanga metetdaksü.

Pakistan nung taoba ghonda 24 tsüngda nisung 5,050 dak tashidak potetogo. Linük nung tang tashi nung nisung 7,15,968 dak tashidak poteter lir. Pakistan nung wave tasembuba pokteter aliba mapang anogo anabuba atonga tashidak agi nisung 100 asüba sangdongogo. Taoba ghonda 24 tsüngda nisung 100 asü aser anogo ka tejakdang nisung 105 asü. Tang tashi nung coronavirus tashidak agi nisung 15,329 süogo.

Minister for Planning and Development Asad Umar lenisüba nung NCOC session agiba mapang Ramazan amungdang non-pharmaceutical

interventions (NPIs) dak sendakba nung sensaksem Hombarnü agitsü telemtetba agi.

NCOC session nungsa Ramazan mapang Pakistan nung vaccine agütsüba sentong indang sensak asem aser ashiba agi, April ita tom nung vaccine telongjunga agizüksü.

NCOC-i anogo ishika tejakdang linük nung tenokdangba balala agütsüba sangdongogo. Taoba hopta tsüngda anogo ka nung nisung 5000 tema dak aiben tashidak potetba sülen iba jenjang agia liasü.

Tang tashi nung Pakistan kübok Punjab province nung nisung timba dak tashidak poteter lir. Iba province nung taoba ghonda 24 tsüngda nisung 2,628 dak tashidak potet aser nisung 57 süogo. Tang tashi nung iba province nung nisung 2,45,923 dak tashidak potetogo aser nisung 6,908 süogo.

Sindh province nunga taoba ghonda 24 tsüngda nisung 466 dak coronavirus tashidak potetogo aser nisung trok süogo, ta Chief Minister Murad Ali Shah-i metetdaksü. Iba province nung tang tashi nung nisung 2,68,750 dak tashidak potetogo aser nisung 4,529 süogo.

### North Korea-i ballistic missile submarine renemer alitsü ta US, South Korea-i bilemer

**Seoul, Rongchii/April 11 (Agencies):** South Korean aser US nung itangitertemi, North Korea-i 3,000-tonne submarine renemer alitsü ta temulung melemi bilemer aser mapang tapet ka nung sayatsü renemer lir, ta osang ajanga Deobarnü metetdaksü.

"North Korea-i 2019 küm July ita sayaba 3,000-tonne submarine ya renemer alitsü ta South Korea aser US nung itangitertemi asatetogo," ta source balalai Yonhap News Agency nem metetdaksüogo.

Agency-i ashiba agi, iba osang ya US nungi aru aser ashiba agi, North Korea-i submersible missile test barge ka tanga tesem kati belenerogo aser iba ajanga submarine-launched

ballistic missile (SLBM) test sayatsü akok ta angateter.

"Ketdangsurtemisa North Korea-i, parnok ajangzüksüsa mapang tetemjen ka nung submarine sayatsü asoshi asadangdar, kong United State nongshitsüba densema lir" ta source kati ashiba Yonhap-i sangdongogo.

US nung ketdangsur temi ashiba agi, iba ya North Korea indang mezüngbuba chichiba ballistic missile submarine asüsü.

Taoba Küm annual military parade ka agiba mapang Pyongyang-i, nuclear-capable missiles arsenal ajungketshir aliba sayaogo aser hadir balala bendenlokba nung SLBM ajungketba ya tongtiba liasü.



Immokalee, Fla kübok clinic ka nung nüburttem Johnson & Johnson vaccine agitsü atema tarensena nokdaker aliba noksa nung angur. Iba clinic nung bendanger aluyimertem aser parnok kibongtem nem vaccine agütsütsü asoshi rangloker inyakdar. Iba health care network ya Coalition of Immokalee workers (CIW) den longjemer item nisungtem nem vaccine agütsütsü atema inyakdar.



## 5,000mAh Battery aketba Oppo A74 aser Oppo A74 5G sayaogo

**New Delhi, Rongchii/April 11, 2021 (Agencies):** Oppo-i brand indang A-series lineup nung Oppo A74 4G aser Oppo A74 5G bendenlokba sangdongogo. Smartphone tasen ana ya Oppo A73 series den tatongtep alitsü, koba taoba küm October ita metetpeladakja liasü aser smartphone ya Thailand, Philippines, aser Cambodia linük nung yokdar.

Oppo A74 indang 5G variant nung quad rear camera, 5,000mAh battery aser 5G connectivity enable asütsü atema Qualcomm Snapdragon 480 processor dena lir.

Ano külen, Oppo A74 4G tesülen triple camera, 5,000mAh aser LCD panel melen AMOLED display keta lir, koba A74 5G variant nung mali. Phone anaprongla yagi 18W fast charging support asür. Tanga shishilembadak iba smartphone sayatsü asoshi company ajanga osang memetdaksü. Tesüiba anogo ishika tejakdang, India nung Oppo F19 sayaogo.

Oppo A74 5G nung 6.5-inch Full-HD+ display den 90Hz refresh rate aser 20:9 aspect ratio angutsü. Phone telung nung Qualcomm Snapdragon 480 processor inoka yanglutsüogo, koba budget

smartphone tem nung 5G connectivity enable asütsü atema alakteta yangluba processor ka lir.

Iba smartphone nung 6GB RAM aser 128GB onboard storage angutsü, koba microSD card ka ajanga memory ulua amshiteter. Phone nung quad rear camera ya rectangular module ka nung inoka yanglutsüogo.

Tesülen, camera system nung 48-megapixel primary camera, 8-megapixel secondary camera aser 2-megapixel shooter ana angutsü. Iba primary camera yagi 30fps nung Full-HD video tem tangokteter. Selfies aser video calling atema, iba phone tejaklen hole-punch cutout nung 16-megapixel selfie camera angutsü. Tanga feature tsütsü repringdangra, iba phone nung 5G, side-mounted fingerprint scanner aser 18W charging support asüba 5,000mAh battery ka keta lir.

Iba phone ya e-commerce site talisa Shopee aser Lazada (Thailand-specific) nung agüja lir, saka official Oppo website nungbo magütsü. Oppo A74 5G - 6GB + 128GB storage jenjang THB 9,998 (Sen 23,700) alitsü.

Oppo A74 indang 4G variant ya Cambodia indang Oppo

official site aser Philippines indang Shopee e-commerce platform nung agüja lir. Oppo A74 4G nung 6.5-inch Full-HD+ AMOLED display angutsü, saka standard 60Hz refresh rate aser 20:9 aspect ratio alitsü. Octa-core Qualcomm Snapdragon 662 SoC den 6GB RAM aser 128GB storage ajanga phone maparen achaayangtsür. Iba smartphone nung Android 11-based ColorOS 11.1 out-of-the-box dena lir.

Camera tsütsü repringdangra, Oppo A74 - 4G variant tesülen triple camera ka angutsü, kong 48-megapixel primary camera den 2-megapixel shooter ana inokja lir. Selfie atema, phone tejaklen 16-megapixel camera ka angutsü aser iba smartphone yagi mode talisa panorama, portrait, night, time-lapse, selfie beautification aser tanga aika support asür. Tanga feature tsütsü repringdangra, iba smartphone nung 4G, dual-band Wi-Fi aser 18W fast charging support asüba 5,000mAh battery angutsü. Oppo A74 - 4G variant jenjang PHP 11,499 (sen 17,400) alitsü

Oppo A74 4G aser Oppo F19 na specification kasa shi alitsü aser F19 ya Oppo Sri Lanka aser India site nung yokdar.

## India nung 2021 BMW 6 Series Gran Turismo sayaogo

**Mumbai, Rongchii/April 11, 2021 (Agencies):** BMW India-i BMW 6 Series Gran Turismo sen lakh 67.90 (ex-showroom) yong sayaogo. Iba 6 Series ya variant asem - 620d, 630d aser 630i nung angutsü.

620d variant ya in-line 4-cylinder 1995cc diesel engine inoka yanglutsü, koba ajanga 190 hp aser 400 Nm torque agütsür. Second 7.9 nung gari yagi 0-100 km/h tashi aoer.

Tanga diesel engine variant - 630d nung in-line 6-cylinder 2993cc engine angutsü. Iba engine ajanga 265 hp aser 620 Nm torque agütsür; aser

second 6.1 nung 0-100 km/h tashi kara aoer, koba variant asem rongnung gari takaratiba ka alitsü.

Variant asem rongnung petrol engine ka dang alitsü, koba 630i variant lir. Iba engine tasazük 1998cc in-line 4-cylinder unit lir aser 258 hp deb 400 Nm torque agütsür. Second 6.5 nung gari yagi 0-100 km/h tashi kara aniteter. Engine asempronlga nung 8-speed automatic transmission ajanga gari inyakyim achaayangtsür.

\* BMW 6 Series Gran Turismo jenjang yamai alitsü:  
- BMW 630i M Sport: Rs

67.90 lakh  
- BMW 620d Luxury Line: Rs 68.90 lakh  
- BMW 630d M Sport: Rs 77.90 lakh

(Jenjang ajak ex-showroom alitsü)

Company-i ashiba agi, online ajanga 6 GT mekaa ayur customer tem nem sen lakh 1.50 alang BMW lifestyle collection aser accessories agütsütsü terenemba lir. Iba nung BMW Display Key densema lir. Iba offer ya online ajanga mekaa ayur atema dang alitsü aser April 30, 2021 tashi dang lapoktsütsü.



Dubai, Rongchii/April 11, 2021: Turkey nung nungtugu chef, Burak Özdemir (CZN Burak)-i amtsük ka nung 'Mirza' zülur Hyderabad nungi India tennis star Sania Mirza den külemi tangokba noksa ka yangi angur.

## Jalukie SDTF senden agiogo

**Dimapur, Rongchii/April 11, 2021 (TYO):** Hokolbarnü, DB Court, Jalukie Town nung COVID-19 atema Jalukie Sub-Divisional Task Force (SDTF) senden menogo. Iba senden nung Jalukie ADC aser SDTF indang Chairman Dr. Tinojongshi Chang menden liasü, ta sangdong ka ajanga metetdaksü.

Iba senden nung DIO aser MO, CHC, Jalukie-i vaccination drive indang maparen metetdaksü aser mapang shitak nung iba vaccine agiadoktsü asoshi ajak dang ajungshia liasü.

Nüburtemi vaccine agitsü asoshi atsüayonga aliba indang nung teloki asadangshia jembli.

Iba dak sendakba nung, nüburtem dang vaccine indang tekümzüksü ashitsü aser parnok dang iba indang osang shitak sangoktsütsü asoshi ADC-i SDTF züngsem nem tetuyuba agütsü.

Dr. Chang-isa, Sorkari Medical Department ajanga agütsüba facility tem mapang shitak nung agizüksü asoshi ayongzüka liasü.

Iba den bendenloksema, vaccination drive sentong takong nua amenoktsü aser achaayangtsü asoshi züngsem aser nüburtem amalitepa inyakba den shilem tajung agitsü asoshi pai ayongzüka, ta kasa sangdong nung shia lir.

## AR-i Kanaram nung medical camp ayongzüka

**Dimapur, Rongchii/April 11, 2021 (TYO):** IGAR (North) kübok Assam Rifles indang Jalukie Battalion-i Honibarnü Peren District kübok Kanaram tesem nung medical camp ayongzüka liasü.

Iba Camp sentong nung tebur 12, tetsür 16 aser tanur 8

densema yimer 36 shi ajangzüko. Tang ama tensa tamajungdang, meimchir aria bilema iba ama sentong tajung katsüba asoshi Kanaram yimertemi aser yimtsüing nung tekolakpurtemi medical team aser Assam Rifles dang pelaba metetdaksüogo.

## India nung HP 'Chromebook 11a' saya



**New Delhi, Rongchii/April 11, 2021 (Agencies):** Kaketshirtem atema India nung HP Chromebook 11a sayaogo. Iba budget laptop nung pre-loaded apps balala inoka yanglutsüogo, koba tang ama Covid-19 mapang kaketshirtem pei kidang maneni kaket shisatsü bushiba tsütsü angazüksü asoshi teyari agütsür.

Iba den bendenloksema, laptop tasenba nung octa-core MediaTek processor aser voice commands atema Google Assistant enable asütsü mechi inbuilt mic ka dena lir. HP Chromebook 11a nung annual Google One subscription angati angutsü, kong 100GB cloud storage, Google experts access, kibong nung züngsem bendenloktsü aser tanga "member benefits" angutsü.

Specification tsütsü repringdangra, HP Chromebook 11a nung 11.6-inch HD (1,366x768 pixels) IPS touch display den 220nits brightness aser 45 percent colour gamut dena lir. Laptop display panel nung bezels tulu alitsü aser bezel tekolaklen webcam angutsü.

Iba laptop maparen Google meyong Chrome OS ajanga

achaayangtsür aser in-house apps talisa Google Drive, Docs, Sheets, Slides aser tanga nung access agütsütsü atema Google Play app store dena lir. User temi iba sabang ajanga third-party app tem download sütettsü.

Laptop nung inbuilt microphone ajanga voice-based command amshia user temi asüngdangyatsü atema tetuyuba agütsütsü akok. HP Chromebook 11a nung MediaTek MT8183 octa-core processor den 4GB RAM aser 64GB onboard storage angutsü. Iba den külemi, küm ka atema user temi Google One plan indang 100GB angutsü. Memory ulua aginürtemi iba laptop ya 256GB tashi atsülanga amshitettsü.

Maneni, battery atema, HP Chromebook 11a nung 37 WHr Li-Ion polymer battery ka inoktsüogo, koba khen charge asünung ghonda 16 tashi amshiteter (standard usage). Tanga feature tsütsü repringdangra, iba laptop nung USB Type-A port aser USB Type-C ports, 3.5mm audio jack, dual-band Wi-Fi, Bluetooth v5, aser HP True Vision HD webcam angutsü.

**ALIAYOKTSÜ LIR**

Hozukhe village  
(Foot Hill Road nungi minute 3 shi pilar)  
Sq. ft nung Rs. 15/- || Contact no- 8974869756



## FIH Pro League: India-i goal 3-2 agi Argentina kokogo

**Buenos Aires, Rongchii/April 11, 2021 (Agencies):** FIH Pro League tie nung India tebur hockey team-i penalty shoot-out nung Olympic champions Argentina madak takok nguogo.

India team nungi Harmanpreet Singh-i goal ana tashi idakja liasü. Team ana tsüingda kanga toktepa asaya tenzük aser tanabuba quarter tetenzüklen minute 21buba nung Harmanpreet-i penalty corner ka ajanga mezüing goal idakja parnok goal 1-0 agi Argentina tejakdang kümadok. Tatsüka dang lir Argentina nung Martin Ferreiro-i minute 28buba aser 30buba nung goal ana atonga idakja parnok half time tashi nung goal Los Leones (Argentina hockey team) pur 2-1 agi tejakdang kümadok.

Argentina pur goal 2-1 agi tejakdang ser asaya aoba mapang, Harmanpreet-i ano minute 60buba nung penalty corner ajanga goal tanabuba idakja telok ana tsüingda goal 2-

2 aküm. Küm ka sülen team ana tsüingda mezüing Pro League match asayar alitsü.

Iba asaya draw nung tembangba ajanga team anaprongla point angutsüsa temsüa aküm, saka tesemdang team (India)-i bonus point angu. India nung goalkeeper PR Sreejesh-i goal kar kümzüktetba ajanga team-i point talila aazüktü maongka angu.

Asayamung temzüing nung renema aliba ama, penalty shoot-out akoker team nem bonus point agütsütsü renema lir.

Penalty shoot-out nung Dilpreet Singh-i Argentina goalkeeper Juan Vivaldi ajanga goal ka idakja India-i 3-2 agi iba asaya makokdang Sreejesh-i Lucas Vila, Martin Ferreiro aser Ignacio Ortiz nung indang goal nokdangteta liasü.

Iba takok ajanga FIH Hockey Pro League table nung India team-i jenjang tenetbuba tongtetogo. India team-i asaya tenet nungi point 12 tashi ngua lir.

Kasa mapang Argentina-i point 11 ngua table nung parnok jenjang trokbuba tongtetogo. Iba asaya nung Harmanpreet-i junga asayaba asadangteta pa nem 'Player of the Match' award agütsü.

"Onoki tezü metangi asayaogo aser ibaji ajak dang tongtibangtiba ama bilemer," ta Harmanpreet-i ashi.

"Asaya tatem tashi onok tezü metangi temlung agüja asaya aser ibaji ajanga onoki takok angu," ta pai ashi.

Tanabuba asaya atema India team-i koba tesem nung melenshia asayatsüla ta asüingdangba mapang, Harmanpreet-i, "Tanü onoki tekümdangtsü card aika angu, ajiasünung itemji kanga azioka asayatsüla ta nibo bilemer. Taruba asaya nung card mangutsüsa onoki itemji temlung nung yur asayatsüla," ta shisem.

Maneni team ana tsüingda Hombar anepongi tanaben asayatsü terenemba lir.

## Tokyo Olympic: Covid-19 puteter athlete atema takdang 300 anepalutsü

**Tokyo, Rongchii/April 11, 2021 (Agencies):** Aruya aliba Summer Games nung coronavirus tashidak puteter athlete tem atema Tokyo Olympics achayangertemi hotel takdang 300 renemtsütsü asoshi asalentong yangludat, saka athlete tem Covid-19 tashidak temaitü mesayatsüla, ta Deobarnü Kyodo nung osangbener sangdong ajanga metetdaksü.

Coronavirus wara prokba azioktsü asoshi, Hombar (12.04.2022) nungi tenzüka Japan indang Sorkari Tokyo nung ita ka tashi "quasi-emergency" mapatong benoker. Tawa, Olympic ayongzüktü aliba tesem - Tokyo nung 'state of emergency' agienba sülen, ita ka majungdang iba yimti nung tanaben Covid-19 dak sendakba tenokdangba kar benoker alitsü.

Harumi waterfront district nung athletes' village nungi

kilometer ishika pila orr aliba hotel takdang ajanga Tokyo Games organising committee-i mekaa ayutsü sentong lir. Iba maparen atema million dollar ishika adoktsü ama asadangteter," ta otongdar sangdong ka ajanga metetdaksü.

Coronavirus positive puteter athlete tem aser iba Games nung shilem agirtem (Covid-19 temaitü mesayurtem), shirnok mozüki nung munga anepalutsü menüingdaker, anogo 10 atema parnok iba hotel takdang nung quarantine asütsü; aser medical staff temi mapang shia repringtsü, ta sangdong nung shia lir.

Covid-19 patient tem hotel tashi senzüsebongtsü atema, committee-i gari 30 tashi anepalutsütsü, ta Kyodo osangbener ajanga metetdaksü.

Tokyo Games dak sendakba

nung taküm February ita sangdongba temzüingtem nung renema aliba ama, athlete tem anogo pezünübuba nung COVID-19 test agütsü. Taoba küm coronavirus wara tenokdangba ajanga Tokyo Games asayamung thinenja arur sülen, July ita iba asayamung tenzüktsü terenemba lir. Tan ita, ano Games dak sendakba nung Covid-19 test aser quarantine yimya atema tetuyuba agütsütsü asadangdar.

Japan nung coronavirus tashidak puteter nisung 500,000 dak tema kümogo aser iba wara ajanga nisung 9,400 jungnüa süogo, ta Honibarnü NHK-i ashi.

Tanga tongtibang linük den medemdangra, Japan nung Covid-19 putetba ya tajemba alitsü. Ajisüaka, Japan nung Covid-19 tanaben adokba ajanga Games atema tebilemstü adoker.



Srinagar, Rongchii/April 11, 2021: Honibarnü, Jammu aser Kashmir Lt Governor Manoj Sinha aser Union Minister of State (Sports) Kiren Rijiju nati Srinagar kübok Nehru Park nung Khelo India Centre of Excellence "Water Sports Academy" lapoktsüba mapang agiba noksa yangi angur.

## Billie Jean King Cup atema India tetsür team Latvia tonga aruogo

**Riga, Rongchii/April 11, 2021 (Agencies):** Aruya aliba Billie Jean King (BJK) Cup asayamung nung shilem agütsü asoshi, Honibarnü India tetsür tennis team - züingsem asem den parnok coach Vishal Uppal nunger Latvian yimtiba Riga tonga aruogo.

Iba asayamung April 16 aser 17, 2021 nü asayatsü terenemba lir.

"India tetsür team Riga tonga aruogo aser Indian Embassy tenüing nungi Mr Praveen, Ms Elina aser Ms Santa den Indian Latvian Cultural aser Economic Forum," ta Twitter sangdong ajanga All India Tennis Association (AITA)-i metetdaksü.

New Delhi nungi Riga tashi Rutuja Bhosle, Zeel Desai aser Karman Kaur Thandi nunger tonga aruogo. Ano külen, India tsür tennis asayar mongin Sania Mirza aser Ankita Raina nunger Dubai nungi indang indanga külem team pur den adentsü.

Taoba hopta nungi Sania aser Ankita nung Dubai nung training agia arudar.

"Team pur anogo ka (Deobarnü) anisüingzüktü aser Hombar nungi tenzüka practice asütsü imlar," ta AITA-i metetdaksü.

India nungi ayamesoa maodang, Uppal-i Twitter ajanga "India nung Tetsür Tennis atema iba asayamung maongka ama lir. Latvia nung külem team pur ajak den tanaben longjemtsü asoshi yongya atar," ta lemsatep.

India tsür tennis team putiotsü nung iba asayamung indang World Group Play-offs tongtetba ya tang mezüing alitsü. Ajisüaka, iba asayamung ya team pur atema kangarabo temela masütsü, kechiyong taoba mapang French Open champion den world No. 54 Jelena Ostapenko aser 2018 US Open semi-finalist Anastasija Sevastova, shiba world No. 11 nung lir, parnok den India tetsür team-i tokteptsü.

Maneni, Latvia tetsür team rongnung tanga züingsemtemji Diana Marcinkevica, Daniela Vismane aser Patricija Spaka nung alitsü.

## June 01 nungi PSL 6 tenzükshitsü: PCB

**Lahore, Rongchii/April 11, 2021 (Agencies):** Anogo atsülangtsür aliba Pakistan Super League trokbuba asayamung ya Karachi nung June 1 nungi 20, 2021 tashi asayatsü terenemba lir. Iba asayamung asoshi Board (PCB)-i COVID-19 SOPs ozüing alema inyaktertem ka danga mezüdoki tapet temerenshi agütsütsü/senchi achitsü sentong renemdar.

Iba asayamung nung shilem agütsüpur ajak May 22, 2021 nungi tenzüka quarantine asütsü, ta Deobarnü Pakistan Cricket Board (PCB)-i metetdaksü.

Peshawar Zalmi coach Daren Sammy aser captain Wahab Riaz nati parnok indang franchise kibur Javed Afridi, shiba bubble shilem nung maden, pa den ajuruteptsü asoshi bio-secure bubble ozüing raksaba sülen, March ita asayar kar dak coronavirus tashidak putetba ajanga iba League atema anogo atsülangja liasü.

Iba asayamung anogo memelenshidang, February 20 aser March 3, 2021 tsüingda league match 14 tashi asayadoker liasü.

Honibarnü, virtual conference call ajanga PCB indang Board of Governors ta senden agiba mapang PSL-6 PCB-i shisem.

tenzükshitsü atema iba telemtetba agi.

Iba senden agiba mapang, PSL-6 atema bio-security protocols, bylaws aser maparen repringshimtsü; aser tarutsü asayamung atema bio-secure maparen tajungba amenoktsüsa asadangshitsü atema PCB-i fact-finding panel züingsem ana shimogo.

"BoG-i panel ajanga asadangteta tem nung olemtep liasü aser report nung lenla maparen ka shitak meinyaki tamakok anguba ngua parnok mepelaba lemsatep; aser iba dak sendakba nung tapet meratem agütsü asoshi tetuyuba agütsü," ta PCB-i ashi.

PSL 6 asayamung takok ngua tenzükshitsü aser mepetmesü kecha melii tembangtsü atema, alima ajungai jangjatsüsa safety management company ka tenzüktsü PCB-i asalentong yangludat.

"May 22, 2021 nungi tenzüka hotel ka kübok asayamung nung shilem agütsüpur ajak anogo tenet tashi quarantine asütsü aser iba den atongsema anogo asem training agütsü. Iba sülen PSL 6 asayatem June 1 nungi tenzükshitsü aser June 20, 2021 nü final asayatsü," ta PCB-i shisem.

## BILEMDANGANG

"Tangazüktsü tim mapang shitak nung angazüktsü kanga tongtibang."